



Panibag-ong atake sang 3ID/PA-Task Force Panay, paslawon! Magtubong sang kusog, rehimeng GMA patalsikon!

Nakatalikod lang si GMA sa iya pagbisita sa Panay sa makaduha ka beses, nagalarga naman ang bag-ong lebel sang pagpang-atake militar sang rehimeng US-GMA. Ini paagi sa Task Force Panay-3ID upod sa CAA/CAFGU kag PNP. Sa idalom sang kabilugan nga padihut sang rehimen nga *“Oplan Bantay Laya”*.

Bag-ong lebel ini bangud nagapalapad ang atake sang rehimen sa nagkalain-lain nga prenteng gerilya sa isla. Nagaluntad ang mga operasyon pang-istrayk kag pangtukod ditatsment sang RSOT (Reengineered Special Operations Team) kag nagdugang ang 47th IBPA sa isla.

May marka man sang paglala sang pamasista sa syudad pareho sang bayolente nga pagbungkag sang malinong nga rali sang mga pumuluyo, pagpangdakup kag priso sa mga maslider kag raliyista. Ini pareho sadtong Hulyo 15 kag Agosto 14 sining tuig, mga okasyon sang pagkadto ni GMA sa Panay.

Ginapasingki man sang kaaway ang *“psy-ops”* ukon paghilo sa pamensaron sang pumuluyo kag pagpaniplang agud pakalainon ang rebolusyonaryong kahublagan.

Desperado nga pagpang-atake sa tunga sang malala nga krisis

Ining panibag-ong atake desperado nga pagpakita sang rehimen GMA nga makontrol pa niya gihapon ang sitwasyon. Apang sa kamatuoran, nagaduling-duling na ini kag mabaskog nga ginatay-og sang tuman kalala nga krisis.

Wala sang arap-arapan ang rehimen sa madasig nga pagmakot sang krisis pangpulitika nga iya man mismo

kahimuan. Mas nagsingki pa gid ang inaway sang mga pulitiko/nagaharing sahi. May nagaalsa nga paksyon sang AFP, ang Grupong Magdalo. Nagkalabuyagyag ang korapsyon ni Mike Arroyo/Jose Pidal kag kaso sa Frafton nga nag-imbolber kay GMA. Ang maniobra ni GMA-Cojuangco nga pagpahalin kay Davide nga nagresulta sa kinamog sang Senado kag Korte Suprema.

Ining mga hitabo madasig nga nagadul-ong kay GMA sa lubos nga pagkahamulag sa malapad nga pumuluyo nga masalaming man sa Panay. Ginakumpas sang rehimen ang lokal nga tinawo sini sa 3ID/PA-Task Force Panay-PNP nga pasingkion pa gid ang tudog-gera. Ini sa tuyo nga hinabunan ang ila krisis kag pagka-inutil sa paglubad sang matuod nga problema sang pumuluyo sa kabuhian.

Paslawon ang atake sang kaaway

Indi matarung ang tudog-gera nga atake sang rehimen. Paggamit ini sang pwersa agud magpadayon sa paghari kag



punggan ang pumuluyo kag NPA nga maglubad sang problema sa duta kag krisis sa kabuhian nga wala man ginalubad sang rehimeng GMA.

Kaangay sang nagligad, ang mga pumuluyo— sa ubay sang Partido, upod ang NPA nga ila tagpangapin— magapaslaw sa atake sang 3ID/PA-Task Force Panay, PNP-CAFGU-RPA-ABB.

1. *Padayon sa paglunsar sang mga taktikal nga opensiba (TO) ang Bag-ong Hangaway sang Banwa (BHB).* Papason sang BHB ang mahuyang nga bahin sang kaaway agud paisa-isa nga lutuson sila kag makakuha sang dugang nga armas para sa nagadaku nga pwersa sang hangaway. Nagakapuhag ang plano kag nagakakugmat man ang kaaway kon mabanatan sila. Silutan man sang BHB ang napamatud-an nga malain kag kontra-rebolusyonaryo nga mga elemento agud mahawanan ang kabaryuhanan sang mga importer. Padayon nga pinahan sang BHB ang mga dalagku nga kumpanya nga wala nagahatag sang buhis sa Demokratikong Gubyerno sang Pumuluyo.

2. *Batuan sang nagahiliusa nga pumuluyo ang atake sang kaaway.* Ang Inaway Banwa, gyera sang pumuluyo sa pagdepensa sa kaugalingon kag sa mga kadalag-an nga naangkon na. Ang ila pagbato mapakita sa paghatag suporta kag mga serbisyo sa ila hangaway, asta sa direkta nga pag-upod sa TO bilang mga lokal nga milisya, ukon magpultaym sa BHB. Upod sa ila hangaway, depensahan sang pumuluyo ang benepisyo nga natigayon na sang rebolusyon— pagpangapin sang kalupaan kag kinamatarung sa pagtalauma; mga kampanya sa pagpataas produksyon, grupong binuligay, kag iban nga kampanya nga may benepisyo ang masa.

3. *Iduso sang pumuluyo ang nagkalain-lain nga kahublagan sa kaumhan kag kasyudaran.* Sa kaumhan, nagapataas ang pagpamatuk sang pumuluyo sa pagtukod distasment kag CAFGU. Pataason pa nila ang pagduso pagpangapin sang kinamatarung kag anti-militarisasyon sa atubang sang atake sang kaaway. Dungan ini sa partikular nga paghulag sang pumuluyo sa isyu sang kasigurahan sa pagtalauma, kampanya sa kalinong kag katawhay sa baryo, ikaayong lawas, kag pagpataas sang produksyon.

May kahublagan man ang nagkalain-lain nga sektor sa kasyudaran kag magbuligay sa kahublagan sa kaumhan. Mahimo nga maangut ang mga isyu sang mangunguma— gutom, isyu sa lupa, kag kahalitan sang tudo-gyera sang rehimen—sa mga

iyu sang nagkalain-lain nga sektor sa syudad.

4. *Lab-uton kag angutan sang Partido kag NPA ang mga CAFGU, PNP, mga tropa kag opisyal sang AFP kag paathagan sila nga magdampig sa pumuluyo.*

Nagaantus man sa krisis sa kabuhian ang pamilya sang ordinaryo nga tropa kag manubo nga upisyal sang AFP, PNP, labi ang mga CAFGU. May mga elemento sa 3ID/PA nga nagasimpatiya sa isyu nga ginpaggwa sang Magdalo Group bangud kongkreto man sa ila sitwasyon. Apang nagahipos lang sila. Sa nagakaigo nga pamaagi, angutan sila kag paathagan sang tindog sang rebolusyon sa ila kag ano ang tampad nga mahimo nila para sa interes sang pumuluyo.

Patalsikon si Gloria

Samtang ginahimo ang mga tikang sa pagpaslaw sa atake sang kaaway, nagahanda ang pumuluyo sa pag-amot sang kusog sa pagpatalsik kay GMA antes eleksyon 2004. Ini nga mga pagpanghanda nagasakop sang mga pwersa sang pumuluyo sa kasyudaran kag kaumhan.

Madasig nga nagalala ang krisis pang-ekonomya kag pangpulitika. Padayon nga nagaduso ang mga pumuluyo sa kaumhan kag kasyudaran sang basehan nila nga mga isyu kag demanda. Ano man oras antes ang eleksyon 2004, mahimo magdebelopar ang likuan para sa pungsodnon nga paghulag sang pumuluyo sa pagpatalsik kay GMA. Magatubong sang pwersa ang pumuluyo sa isla para tapuson na ang rehimeng GMA kag matukod ang caretaker nga gubyerno sa pagpanguna sang Bise Presidente

Teofisto Guingona kag isunod naman ang eleksyon.

Kon indi mapatalsik si GMA antes ang eleksyon, himakasan sang pumuluyo nga indi na siya pagpapungkuon liwat sa pagkapresidente. Indi na gusto sang pumuluyo nga maglawig pa gid si GMA sa poder. ☐



Nagapatong sa malala nga krisis ang panibag-ong atake sang rehimeng GMA

Ang panibag-o nga atake sang rehimeng GMA kag 3ID/PA-Task Force Panay nagapatong sa madasig nga paglubag sang krisis sa ekonomya kag pulitika. Mas lala subong ang krisis ikumparar sadtong 2001 sang gindeklarar niya ang tudo-gyera.

Nag-atras sa 3.2 porsyento halin sa mga 4 porsyento ang GDP (*gross domestic product*) ukon kabilugan nga kita sang ekonomya sa sulod sang pungsod sining ikaduha nga kwarto sang tuig. Rason sang paglugdang amo ang pagnubo sa produksyon sa agrikultura, manupaktura kag maluya nga eksport. Sining Hulyo, masobra 12 porsyento ang wala sang trabaho. Masobra 40 porsyento sang populasyon ang nagakabuhi sa mas manubo pa sa P32 kada adlaw. Samtang P558 ang kinahanglan kada adlaw sa pamilya nga may anom ka tawo, P280 ang minimum nga sweldo kag indi pa gani lubos napatuman.

Masobra P5 trilyon ang utang sang gubyerno kag ginapapas-an sa pumuluyo. Indi man basta-basta lang makapangutang ang rehimen sa US kag Hapon bangud may ila man krisis kag problema. Nagbuhin sang 5.2 porsyento sa una nga pito ka bulan sang 2003 ang buhis halin sa OFWs (*Overseas Filipino Workers*). May nagbalalik na sa pungsod kay wala/kulang sang maobrahan sa luwas. Daku ang depisit sa badyet sang gubyerno nga nagaabot na sa tantya nga P263 bilyon sini nga tuig.

Agaway manggad kag poder

Nagagamay ang manggad nga makurakot sang mga pulitiko. Gani nagsingki ang kinamog sa kubay nila sa pag-agaway sang manggad kag maniobra sa pag-angkon sang poder sini nga eleksyon. Bunga sining banggianay ang sunod-sunod nga paghinabuyanay sang higko sa korapsyon sang mga pulitiko kag opisyaes sa militar. Pila sini ang natabo nga pagbuyagyang sang nag-alsa nga Magdalo Group, kaso ni Mike Arroyo/Jose Pidal, iskandalo sa Fraport nga nag-imbolber kay GMA.

Ang malala amo ang kinamog sa tunga sang Senado kag Korte Suprema sa pagpahalin kay Davide. Padihut ini nanday GMA-Danding Cojuangco. Ginahingabot ni Danding si Davide bangud kontra-Cojuangco ang disisyon sang Korte Suprema angut



sa P130 bilyon nga kwarta sang mangunguma sa *coco levy*. Pinasugtan ni GMA ang hulag ni Danding kag konggresista nga NPC kag may nadala nga Lakas nga birahon si Davide kay gusto ni GMA buligan man siya ni Danding sa eleksyon. Nasundan pa gid ini sang pag-agaw sang duha ka militar—Panfilo Villaruel, Philippine Air Force reservist; kag Navy Lt. Ricardo Catchillar—sang Naia *control tower* bangud sang ila higit-anon sa rehimen. Pinatay sila kag nangin kontrobersya ang pagpatay sining duha. May pamahug naman ang Grupong Magdalo nga mahimo sila mag-alsa bangud sang amo nga pagpatay.

Bangud sining sunod-sunod nga kinagamo, nagpinalagyo ang mga imbestor labi na gid sadtong Hulyo. Wala sang bastante nga dolyar nga pundo ang rehimen, gani bagsak ang balor sang pisos—masobra P55 kada dolyar. Nagtaas pa gid ang presyo sang gasolina sining Nobyembre. Pumuluyo ang nagaagwanta.

Kinamog man sa Panay

Apektado ang Panay sa pungsodnon nga krisis bangud agrikultura ang nagapanguna nga ginasaligan sa isla. Makita man sa rehiyon ang pagkinamog sang lokal nga pulitiko sa agaway sang poder sa maniobrahanay sa eleksyon 2004. May kagaruhan kag ginakamugan man nila ang proyekto nga makwartahan. Ini pareho sang P7 ka bilyon nga International Airport nga ginapunduhan sang Obuchi Fund. Pagpundar sang Coal Fired Plant sang KEPCO sa Ajuy tapos saylo sa Banate. Panay Power

Sundan sa “Nagapatong...”, sa pahina 14

MGA BALITA

47thIB/PA, gindeploy sa Panay

Gindeploy sining Nobyembre 2003 ang dugang nga batalyon sang 47th IB Philippine Army (PA) sa kaumhan sang Sur nga Panay sa kabukiran sang banwa sang Igaras, Tubungan kag Miag-ao, Iloilo.

Dugang ini sa daan na nga mga tropa sang Provisional Infantry Battalion (PIB) nga manugtatto na ka bulan nga nagatenir sa mga baryo sang Igcabugao kag Tabiac, Igaras.


Pat-ud nga magalala pa gid ang pagpanglapak sang tawhanon nga kinamatarung sang pumuluyo. Ini kapin kay wala pa mahaw-asan sang “war shock” ang 47th IB/PA sa inaway sa Mindanao. Gani nagapatarasak lang sila.

Halimbawa ang natabo sang una nga simana sang Nobyembre. Sang ginbuy-an ang 47thIB/PA sa Sentral Panay sang gintreyning liwat sa Kampo Peralta, napatay nila si Morgan Dalid, isa ka CAFGU sa Daan Norte, Tapaz, kay nakita lang nila nga nakabayong sang patig kag may armas.

Sa baylo nga tagaan sang nagakaigo nga kalubaran, pagpabaha sang tropa militar sa

kaumhan ang nangin solusyon sang rehimg US-Macapagal-Arroyo.

Ditatsment, pinalukpan sang NPA Ginpalukpan sang NPA agud



puhagon ang ditatsment sang 31st Reconnaissance Company sang Provisional Infantry Battalion sa Brgy. Pinaopaoan, Igaras, sadtong Nob. 20, 2003. Ini bilang sabat sa dalayon nila nga pagpamahog kag pagpakugmat sa pumuluyo.

Gin-ako sang ditatsment kumander nga foxhole sang CAFGU ang inigo sang rifle grenade sang NPA. Apang indi matuod ang ginpaggwa niya sa Ratsada balita

nga NPA ang nakaigo sang mga balay sang masa sa palibot kay ginpalapitan gid gani sa gab-i.

Ang nakaigo sa mga balay sang masa sa palibot sang ditatsment amo ang pagbalos sang kaaway nga umabot sa 10 minutos nga panerbiyos nga paarak, kag liwat naman nga pagpaarak kada oras asta mag-aga.

Ginapagwa man sang propagandista sang militar nga kuno naakig ang NPA kay naagaw na sang Phil. Army ang masa sang NPA. Indi ini husto bangud wala natigayon ang nasambit nga pagpuhag kon wala

sang suportang masa.

Kon natigayon man nga nakarekrut sila sang CAFGU indi ini hilway nga pagpamat-ud sang pumuluyo kundi resulta sang ginkumbinar nga taktika sang pagpang-into kag pagpamahog. Indi man gani nila maseguro kon ang ila gina-armasan tampad nga magaalagad sa ila ukon mahimo man nga sekreto nga nagadampig kag nagapakig-angut sa NPA. **DD**

“Nagapatong...”, halin sa pahina 13

Plant sang mga Lopez nga binakal sang Mirant, Phils. Alawayan man ang kagarukan sa P125 milyon nga housing project nga gintukod sang Ace Builders.

Sa bahin sang AFP, ginabantayan sang matag-as nga upisyal sang 3ID/PA ang hulag sang iya mga nga opisyal kag tinawo. May ginpang-imbetiga na nga mga upisyal sa pagduda nga imbolbado ukon nagasimpatiya sa Grupong Magdalo.

Sa kabilugan, maapektuhan ang pagpang-atake sang

rehimen batuk sa rebolusyonaryong pwersa bangud sang kaugalingon nga krisis. Isa diri amo nga malimitahan ang ila resorsa kag badyet. May mahigot nga pwersa militar sa pagbantay sa paksyon ni GMA batuk sa armado nga karibal. Ara ang pamahug sa kudeta. Demoralisado ang tropa militar-PNP-CAFGU bangud sang nagakalatabo subong sa gubyerno nga ila ginaserbisuhan.

Determinado ang rebolusyonaryong pwersa nga paslawon ang kaaway kag magbulig debelopar sang kahimtangan nga mapatalsik ang rehimg GMA. **DD**

Alipalok

Sa isa ka baryo, gintipon sang RSOT ang mga pumuluyo.

Armi: “Ginapatawag man kamo sang NPA sa mga miting?”

Tumandok: “Huod Sir.”

Armi: “Ano ang ginamitingan ninyo?”

Tumandok: “Pagpananom sir...ngaa haw, malain ang magpananom?”

Armi: “a, eh hh... indi man...”

Tumandok: “Ti man gali!”

* * *

Hambal sang armi samtang nagakaon saging sa balay sang masa: “Tamarin inang mga NPA... husto lang na sila magpanago sa talon kag magsulat-sulat...”

Indi gid makahimugon ang mal-am nga tagbalay: “Uhummm, masaligbat ako...Sir...wala nagamala ang kamot sang mga NPA. Nakita mo na ang bakulod nga damo saging? Sang una, kakugnan ina...sila ang nagpananom dira. Sa kamatuoran, NPA ang nagtanom sang saging nga ginakaon mo!

Naghipos na lang ang armi, nahibal-an man niya nga may NPA nga paryente ang tagbalay.

Sa isa ka pulong-pulong sang armi-PNP, naghambal ang pulis nga damo paryente sa baryo:

“Nahibal-an ko may mga kabataan kag

kasimaryo ako nga nag-entra sa mga abyan naton sa bukid...akon tani, bilang mga ginikanan kag paryente, kumbinsehon naton sila nga magbalik sa sabak sang gubyerno... tapos, buligan nga mag-eskwela, magpangita sang trabaho, kag magpangabuhi sang malinong...”

Nagsinaligbat na ang tagabaryo kag inulanan
sang sabat ang pulis.

“Indi na ato sila mga bata, hamtong na sila sa pagdisisyon...”

“Maayo gani nga didto sila damo pa sang mabulig sa tawo sangsa mabun-an sa baylehan, mangin adik...”

“Wala man kwarta ang pamilya agud ipa-iskwela!”

“Ang mga naga-iskwela na gani sa mga kolehiyo kag unibersidad ang nagapabukid...”

“Wala man maobrahan... kag bisan ang may obra subong nagakadulaan trabaho...bisan sa abroad pa...”

“Ano nga pangabuhì nga malinong man? Paano nga makalinong kay daguok permi tiyan ta sa gutom? Samtang ang iban, gapabuy-on sa korapsyon sa gubyrno!”

“Bisan gani militar nagareklamo kag nagaalsa ...
malinong pa nga pangabuhi ina?”

Indi na mahibal-an sang pulis kon ano, diin, sin-o, kag paano niya sabton ang saligbat sa iya.

